

防
河
奏
議

皇上御極之元年六月

命臣曾筠以兵部左侍郎堵築河南中牟縣堤工

漫口奉

上諭河南居天下之中爲腹心要地爾宜恪勤將
事俾黃流循軌居民安堵速竣厥工毋負茲任

臣卽欽遵銜

命星馳尅期僦築於是年冬月告竣聞明年

上念河臣駐劄淮浦遠莫能馭

簡曾筠爲司河之副凡豫省黃河兩岸堤防一切

修守事宜俱有專責猥以簪筆詞臣未嫻治
水之道仰蒙

皇上訓諭諄詳敬謹遵奉竭蹶辦理受事以後每
鼓棹於洪波巨浪之中周覽於高原平隰之
壤風雨寒暑勤加巡歷毋論紳士僚屬以及
田夫野老凡有單詞片語關係河防者靡不
採擇以期益

國利民仰賴

皇上德福攸隆敬誠感格河定民安歲登豐稔四

年冬

上天垂象黃河澄清二千餘里實千古罕觀之上瑞也繼而督理河東遷任江南統計趨走河干轉瞬十有一年矣竊惟河有呼吸變遷形勢攸分水有清濁強弱性情迥別所以障其狂而束其流祛其害而資其利者所關綦重仰惟

聖祖仁皇帝念切運道民生

翠華屢幸河工治河方略備集大成我

皇上丕顯丕承善繼善述沛如天之仁運如神之智

指示修防圖維善後其間因地制宜隨機應變或患在下而先治其上源或患在上而先理其下游或導之而使朝宗或滯之而使利運或事似平易而其機不可須臾緩或勢處危難而其效可以旦夕奏者平險疾徐因時操縱凡_臣知識心思之所未諳繕摺奏請蒙

皇上披圖覽說

批示精詳抉要指微幾先洞鑒是以

異命頻頒遵循罔後在河南則修築黃河兩岸之
大堤除汎濫而泰安湖在山東則清釐運河
夫役之積弊去浮冒以收實効在江南則禹
王臺壩工成而沐水歸墟六塘河故道闢而
駱湖向若黃運兩河加築善後堤工以及保
護江濱瓜洲城郭而民安衽席漕利輓輸至
如高堰石工尤屬全河關鍵我

皇上發百萬帑金謀兆姓莫安之計立千年鞏固

之基蓄清抵黃永垂利賴凡此江淮河濟爲
疏爲濟爲修爲守皆仰荷

宸謨之廣運

睿算之靡遺是以條分縷晰綱舉目張因勢利導
動合機宜今者黃運河湖安流底定堤埽開
壩固於金湯歲省度支億萬計而庀材之富
屹若崇墉宣防之事駸駸乎有成矣方愧忝
竊

寵光迄無寸補乃沐

溫綸疊貢旋歷

宮階

予叅幾務勞未宣而賞已懋

恩愈渥而報益難受此

殊榮彌深儆勵不亟舉數年來之仰承

訓示者昭著於天下後世則人但知享平成之福

而不知皆由

皇上啟

臣

之愚策

臣

之懦鑒

臣

之誠信

臣

之專始

克收此成效而謂樗材淺識敢膺重任而希

底績歟爰就章奏所存有關於河防之大者
裒而輯之使普天薄海共曉然於曾筠所以
經理河工者悉稟

宸衷之籌畫且以徵上下之間一心一德

聖主疇咨臣工宣力其難其慎有如斯也若夫

皇猷巍煥上媿禹功史臣自有載筆書之者奚敢

以不文之辭頌揚

天子之弘烈於萬一謹爲拜手稽首恭紀始末并

之簡端

雍正十一年九月十八日

奉天侯爵世襲一等公阿敏

防河奏議目次

卷一

堵築十里店漫口合龍

會議豫省河工保固事宜

請挑倉頭口引河

附紀

豫辦歲搶修料物

會估豫省黃河兩岸堤工

附紀

增設分防廳員汎弁

委用協理道員

建築石家橋一帶埽壩等工

條陳河工應行事宜

豫撥歲搶修銀兩

議留堡夫並建堡房

估修月格等堤

留工効力人員

防河奏議卷一

奏為奏請將河道總督務經督辦

堵築十里店漫口合龍

題為飛報漫口合龍日期恭慰

聖懷事竊臣等於本年六月內欽承

諭旨堵築中牟縣十里店大堤漫口除西口合龍

已於七月十四日

奏報在案其十里店東口水湧溜急施功匪易

蒙

皇上指示機宜臣等凜遵

聖訓詳加審慎相度地勢情形於上下堤頭盤築
壩臺接連進埽率領奉

旨勅發各官並揀選河工諳練人員分投任事俱
各奮力爭先風雨無懈晝夜僣堵自入冬以
來天氣晴和仰賴

聖主敬誠昭格神人協應於十一月初十日申時
合龍斷流現於埽壩背後建築靠壩月堤以
資鞏固所有合龍日期相應會疏

題報伏乞

皇上睿鑒施行雍正元年十一月十一日

題奉

旨先聞中牟縣堤口漫決朕念民生深爲軫懷覽
奏中牟縣十里店東口已經堵築合龍斷流知
道了但係隆冬所築工程仍加意防守保固該
部知道欽此

會議豫省河工保固事宜

題爲欽奉

上諭事雍正元年七月初七日廷臣怡親王等傳
旨河南巡撫石文焯奏稱黃河沁河之水六月二
十二日長發漫溢姚其營無堤之處衝決詹家
店馬營口堤三十丈著派出大學士張鵬翮前
往河南會同總河齊蘇勒巡撫石文焯侍郎嵇
曾筠將乘秋水減退永遠保固之處詳加議定
張鵬翮親身持來具奏欽此欽遵臣等齊集河

南馬營工所周覽黃沁交會形勢南岸廣武
山高峙北岸係屬平地沁河之水自西來會
黃於此伏汎時沁黃二水先後迭長則循流
而逝若遇二水並漲南高北卑易致涵湧必
竭盡人力以資隄防其勢然也臣等遵奉
諭旨會議河南黃河馬營等處保固工程事宜仰
見我

皇上軫念河道民生務期安瀾以資永賴至意幸
荷

聖主敬誠昭格感召

神庥水勢消落馬營等處漸次堵築成功所有
豫省河工應行保固事宜謹據臣等一得之
愚詳具條議是否可行伏候

聖裁再照條議事宜字多逾格貼黃難盡伏乞

皇上全覽施行

一秦家厰係捍禦沁黃交會之關鍵修防保
固最爲緊要大壩靠堤並月堤應再加幫
寬厚均至底寬十丈頂寬四丈高一丈至

一丈五尺不等應照南河例歲修每年聽
河南撫臣估計

題銷仍派本管廳員駐工防守協同千總帶領
河兵椿埽手人等不分雨夜住工修防如
三年著有勞績聽撫臣會同河臣具

題以應陞之缺卽用如或怠玩不時查叅嚴加
治罪其修工夫役仍照例着地方官僱募
不可遲悞如有遲悞照例叅處

一秦家廠大壩北尾堤應築堤一道接連遙

堤底寬十二丈頂寬五丈高一丈二尺加
鑲埽工以護其衝庶溢出之水不致下注
詹家店有頂衝之險但遙堤尚屬卑薄應
再加幫底寬四丈頂寬一丈與舊堤相平
再於頂上加高三尺

秦家厰南尾堤應接至榮澤縣所管臨河
大堤底寬十丈頂寬四丈高一丈以資捍
禦

馬營舊有河形且地處窪下一遇泛漲保

固最難應將壩後土堤加幫寬厚均至底寬十五丈頂寬六丈高一丈至一丈七尺不等

一詹家店舊堤捍禦沁黃交會之水亦關緊要應再加幫寬厚均至底寬十二丈前面於卑窪之處加添埽工以資防護

一沁黃交會之處長有沙灘沁水會黃不暢今冬水落之後該督撫帶領管河道廳及地方官親往查看審度形勢如係老灘則

挑挖引河俟水長風順開放若係淤泥人力難施則乘長水半淹之際用南河鐵籠子操舟疏刷沙隨水去如此則沁水暢流不致泛濫於姚其營一帶卽秦家廠馬營等工亦可資保固矣

一北岸太行堤自武涉縣木藥店起至直隸長垣縣止係奉

聖祖仁皇帝指示修築之工關係黃沁並衛河運道重門保障應令河南撫臣嚴催承修各官

作速修築務期堅固一律全完如有遲延
聽其指叅

一堤工既經修築堅固而防守必須能員臨
河各堤仍令管河廳汛官駐劄本汛近堤
之處早晚巡防不許仍前遠駐府縣城內
衙署以致水發搶護鞭長莫及自今河南
廳汛官員應令總河巡撫不拘資格揀選
熟諳能員

題補保固工程三年限滿該督撫具

題准其應陞之缺卽用如有怠悞不時查叅其
太行堤應令州縣官照所管之地不時巡
防遇風雨水漲之時嚴加防護不許奸民
盜決堤工如有盜決者將奸民嚴加治罪
其失於巡防之地方官并隱匿不報之道
廳等官俱照例嚴加議處

一河南黃河兩岸臨河大堤修築年久風雨
淋漓致有卑薄之處應令河臣於冬間會
同撫臣親往逐一查看將卑者加高薄者

加厚如有頂衝之處修築月堤其應用錢糧聽其估計會

題工完之日該撫查明核實報銷至河南州縣官原有兼管河務之責如有水發搶修之際應令地方官協同僱夫辦料如有推諉膜視者照例嚴叅

一黃河南岸中牟漫口二處堵築工完之後應令中牟縣管河縣丞移駐工所加謹防護遇汎水漲發該廳汎官協同該地方官

盡心保固如地方官推諉膜視照例嚴叅
臣等謹合詞會

題奉

旨交與總理事務王大臣會議具奏欽此

請挑倉頭口引河

奏爲欽奉

上諭事竊臣欽承

諭旨會議秦家厰堤工事宜仰見我

皇上注念河道民生務期安瀾永慶臣受

恩深重勉竭駑鈍悉心籌畫伏思河工須審度形

勢以定疏築之宜查沁黃交會姚其營秦家

厰一帶皆屬頂衝但此係下流受患其上流

必有致患之由臣因於本月初六日由武陟

縣至孟縣渡口僱覓小舟順流東下詳勘情
形見北岸孟縣溫縣所屬河道長有沙灘將
大溜逼趨南岸至倉頭口廣武山根以致崖
岸汕刷民居坍卸至官莊峪大溜又爲山嘴
所挑直注東北於是姚其營秦家廠一帶遂
爲頂衝沁黃並漲之時堤工危險端由於此
臣愚以爲下流固須堵築上流尤貴疏通應
於倉頭對面所長橫灘挑開引河一道直接
中泓俾水勢順流由西北徑達東南不致激

射東北則姚其營秦家厰一帶可免頂衝之
患再查釘船幫大壩挑水南行甚屬有益但
孤立水濱須鑲建鴈翅以資幫護再於大壩
上下相度地勢添建挑水埽壩二座庶秦家
厰衝激之勢可減堤工賴以保固此臣一得
之愚謹繪圖貼說繕摺奏

聞恭請

皇上訓示遵行伏祈

睿鑒雍正元年十一月十九日

奏奉

旨發總理事務王大臣議定另有部諭欽此議覆
准行雍正元年十二月初二日奉

旨依議欽此

附紀

雍正元年六月豫省黃河南岸中牟縣之十里店堤工漫溢臣曾筠奉

命堵築選員隨帶馳驛前往會同河臣撫臣并力搶築旋慶安瀾因思豫河之患全由於北岸武陟秦家廠之決口遂致河心淤高水行兩岸東衝西突其性難馴是則治豫河者必將使武陟上游水勢條順而後振裘挈領始可徐圖下游以次第施功查上游水勢自三門

七津建瓴而下歷孟縣溫縣北岸長有沙灘
逼水南趨至倉頭口遶廣武山根逶迤屈曲
而下已成兜灣之勢及至官莊峪則有山嘴
外伸形如挑水叉由西南直注東北沁黃交
滙之區秦家厰一帶頂衝受險以故旋堵旋
決頻年爲患

聖天子宵旰憂勤多方

指示務期永遠保固

曾筠躬承

諭旨敢不悉心籌畫以期仰副

皇上慎重河防至意謹爲之巡歷上源沿流審視
露處小舠越宿晨興憑高遠望灼見於致患
之由端在倉頭口對面橫亘之沙灘若不及
早疏濬則灘形日長山嘴之挑水益急自南
而北注之勢愈甚雖於下游竭蹶堵築終屬
無益今議就倉頭口以上之沙灘開挑引河
一道直接中泓準對官莊峪下游之水口越
過山嘴俾水由西而徑達於東則利導其勢
而就下之性已順旣順其性而直行東向矣

豈復有漩洄北折之理乎審視既定據實

奏請奉

旨廷臣會議准如所請

曾鈞

凜慎將事遴委朱藻

楊守知范昌治等鳩夫擇吉開挑引河工長
六百三十丈該地民人咸知衛其田廬踴躍
應募畚鍤趨事費帑無幾成功甚易而速伏
汛屆臨乘水長風順挑開引河頭頃刻掣溜
奔騰上源黃流湧注東下官莊峪山嘴不能
挑水北向大溜全走中泓而引河大成矣引

河成則北岸秦家厰一帶安於磐石向之橫
流激湍至難抵禦者乃今盡入中泓安流無
恙而武陟沿河地方桑麻遍野信乎治其本
則費省功倍不得其要雖徒勞無益也夫下
游受患其上游必有致患之由

曾筠
仰承

聖王永遠保固之明訓惟有早夜圖維審理度勢
循流溯源以冀効奔走愚誠至於防河要指
實未嘗窺見萬一也

豫備歲搶修料物

奏爲欽奉

上諭事臣竊查黃河兩岸土性虛鬆凡頂衝掃灣
迴溜侵刷堤根全賴秫草椿麻捲埽鑲墊若
無預備料物每遇水長工危輒至束手無措
卽當時發價購買未免青黃不接價值旣昂
運送需時緩不濟事今蒙我

皇上俯念河工料物關係緊要

諭令動用司庫錢糧仰見保固河工安全黎庶至

意臣愚以爲應用料物與其採辦於後毋寧預備於先查江南各廳員每歲於冬月請領銀兩購買料物隨時應用豫省黃河兩岸似應照依南工每歲冬間該廳員具詳撫臣酌撥司庫錢糧分發沿河州縣預爲採買堆貯險要工所以備臨時動用工完核實估銷如濱河出產有限其近河百里內外州縣亦發銀兩辦買量給車脚以資運送庶料物應手修築有資雖有險工不致臨時遺悞臣不揣

冒昧是否可行恭候

聖裁謹具摺奏

聞伏祈

睿鑒雍正元年十一月十九日

奏奉

旨著總理事務王大臣會議具奏欽此議覆准行

雍正元年十二月初二日奉

旨依議欽此

會估豫省黃河兩岸堤工

題爲陽武大堤危險亟宜修防以資鞏固事該
臣等會看得前因陽武大堤危險應添遙堤
以資重障並自豫省至徐州一帶臨河大堤
因年久廢弛應需修築之處甚多
臣等恐工
費不貲不敢輕舉前經具疏

題請奉

旨動庫銀修築仰見我

皇上軫念河工重大籌畫萬全之至意

臣

等遵卽

率同道廳印汛等官逐細查勘豫省南北兩岸堤工歷年久遠未經加幫雨淋風刮日漸廢削兼因邇年河心淤墊兩岸積高向河一面地勢卑窪者僅餘二三四五六尺不等一經汛漲水無容受出漕浸漫隨潞汕刷在在堪虞亟應加幫高寬方資捍禦其北岸堤工自滎澤縣起至山東曹縣交界止南岸堤工自滎澤縣起至江南碭山縣交界止綿亘迢遞兩岸共約計千有餘里其中有應行幫築

遙堤月堤格堤均關緊要應一例加築以資
重障但因中牟漫溢之後河底墊高水流散
漫而大溜掃灣堤上移下之勢靡定俟過桃
伏秋汎水往下刷河有定軌時再爲量勢確
估另行具

題外今擇其大堤最險要緊之處按照形勢分
別段落或加幫南面或加幫北面因地隨宜
酌量估計其北岸應行加幫堤工長四萬七
千三百四十丈除舊土一百九十三萬七千

五百三十九方零應添新土一百七十六萬
四千五百四十六方零共需土方銀二十二
萬九千五百六十兩六錢一分零南岸應行
加幫堤工長七萬六千四百五十六丈除舊
土三百七萬七千五十三方零應添新土二
百六萬七千五十方零共需土方銀二十六
萬八千七百四十六兩一錢八分零通共需
銀四十九萬八千三百六兩八錢零查其中
之鄭州中牟陽武所屬有頂冲危險萬難刻

緩之處業經動用司庫銀兩分給疾僨修築
茲據署河南管河道楊守知造冊估報前來
臣等覆加親勘核明無異除原冊送部查核
俟覆准之日令河南布政司動庫銀給發各
州縣一例僨修外理合具疏會

題伏乞

皇上睿鑒勅部議覆施行再照歸德府所屬堤工
今估計於臨河北而現在均屬旱地可以節
省土方但此處河崖卑矮倘遇汎水出漕漫

至堤根難以取土之時臨期相機改幫南面
可也至豫省虞城以下以至徐州一帶卑矮
堤工屬江南地方其應行加幫之處現在詳
勘丈量俟確估完日另行具

題合併聲明雍正二年三月初八日

題奉

旨該部速議具奏欽此部議准行雍正二年四月
初二日奉

旨依議速行欽此

附紀

豫省堤工因修治之需向無額設而經理乏人遂致卑薄殘缺日久廢弛曾筠自代置豫撫卽鯁鯁爲慮泊奉

命堵築中牟決口兢惕於前車之鑒綢繆於未雨之防益知修治兩堤急不容緩不揣冒昧據實

奏請仰賴

皇上智炳幾先圖維善後於曾筠未經陳

奏之前已

諭令大學士臣張鵬翮前詣河南會同河臣撫臣

暨

臣曾筠

詳加定議欽遵

異命條晰備陳兩岸堤工得亟爲修舉維時陽武
大堤最稱險要河臣齊蘇勒

題請先爲搶築其餘應行加修之處恐工費不

貲蒙我

皇上屢念河防緊要不惜帑金大加興築復

命臣曾筠

爲副總河專管豫省河務仔肩重大愴

惴小心仰體

皇仁沿堤勘估溽暑嚴寒必親必慎卑薄者議增
培殘缺者議幫補準地形以定崇卑酌水勢
而分緩急周行審視相度會計約費四十九
萬八千三百兩有奇當與河臣撫臣會疏

題估及分任印河各官給帑承築又復分別稽
查量取土之遠近定工程之難易於原估數
內覈實減省計實用銀四十二萬三千四百
兩有奇由是豫省堤工長虹綿亘屹若金湯

矣竊又念夫有堤而無人猶無堤也有人而無其具猶無人也乃爲之建官司設兵夫而董理有人矣請歲修製濬船而修防有具矣至於頂衝危險之區或增築遙月格堤以爲重障或加修埽壩防風以資捍禦靡不次第經畫先事預防東水歸漕河心愈刷愈深不復有漫灘旁溢之患今者千里長堤崇墉屹峙萬家婦子盡慶盈寧皆由我

皇上睿慮精詳河流底定豈非千萬世之利哉

增設分防廳員汛弁

奏爲請增豫省河員汛弁並改設河兵以重修防事竊查河南黃河兩岸堤工綿亘千有餘里地方遼濶舊設道廳汛員甚少往往不能兼顧以致悞事至防守堤工雖有額設堡夫俱係鄉民每遇汛險搶救之事緩急失宜徒費錢糧難收實效查江南黃淮河務設立淮徐淮揚二道分任統轄其沿河廳員並河管兵弁量地遠近畫界分防修守有法工賴其

利今豫省河工臣等詳加酌議北岸關係運道民生最爲緊要舊設管河道一員應令駐劄北岸兼管彰德衛輝懷慶三府河務再於南岸添設巡道一員兼管開封歸德河南三府河務查現在開歸道管理糧儲驛站鹽法復令兼理地方事務似屬太繁應止令管理糧驛鹽法其整飭地方歸兩岸河道管理庶幾呼應得靈至沿河聽員除歸德府屬已有通判一員毋庸議增外查開封府屬南北兩

岸堤長工險止有管河同知二員懷慶府屬
六縣皆係濱河連年水勢漫溢工程險要止
有管河通判一員顧此失彼鞭長莫及應於
開封府南北兩岸各添設管河同知一員懷
慶府添設管河同知一員分轄防守兼司捕
務其不係沿河州縣仍聽舊設清軍同知管
理再請於大州縣添設千總一員中小州縣
添設把總一員每一里分設河兵二名巡守
防護所有千把總員缺卽於南工熟諳河務

効力弁目並椿埽手內選補令其董率修防
練習椿埽庶有堤有人可免廢弛其千把總
河兵仍聽本汛該管廳員統轄調遣倘一縣
之堤有分屬南北岸者每遇汎水長發隔河
防險勢難周顧應令接壤汎弁南歸南汛北
歸北汛就近管理其廳汛員弁俱各駐劄險
要工所如有疎防河弁與汛官一併照例嚴
加議處則耳目近而防守周矣其原設堡夫
選壯健者改充河兵餘俱裁去至新募兵丁

恐不習河務不諳椿埽做法應於江南十河
營內酌量抽撥充頭目教習新兵如果著
有成效卽行拔補把總以示獎勵所需俸餉
等銀除裁存堡夫工食之項動支給發外倘
有不敷統於藩庫內撥給再懷慶府屬之武
陟縣險工甚多武陟縣丞令其專管黃河并
請添設主簿一員專管沁河庶修防各有專
司堤工藉以鞏固矣臣等一得之愚是否允
協謹會摺

請

旨伏乞

皇上睿鑒訓示施行雍正二年正月初六日

奏奉

旨吏戶兵三部確議具奏欽此部議同知主簿等

官應如所奏添設其添設巡道及千把總河

兵之處均毋庸議本年三月二十七日奉

上諭嵇曾筠所請開封府南北兩岸各添設同知
一員懷慶府添設同知一員武陟縣添設主簿

一員俱依所奏添設今伏汎伊邇著交與總河齊蘇勒一面將熟諳河務人員作速揀選補授赴任辦事一面具題保奏著先行文諭知欽此

又於本年四月初三日怡親王大臣等面奉上諭嵇曾筠已授副總河職銜伊奏請添設河兵一事爾等所議毋庸添設但總河駐劄南河兼管運河於河南黃河相去甚遠猝有緊要工程實難相顧故將河南黃河另著副總河管理若無標下官兵難供驅使總河標下十河營兵數

甚多或令齊蘇勒酌撥分給務期永遠可行爾等詳議具奏欽此王大臣等議覆應就近於河南撫標撥守備一員千總一員把總二員馬兵一百名聽副總河差遣至總河標下十河營弁兵應令齊蘇勒酌撥分給聽副總河就近使用等因本年四月二十三日奉
旨依議欽此

委用協理道員

奏爲錢糧關係重大稽察須有賢員恭請

訓示仰祈

睿鑒事竊惟黃河兩岸堤工荷蒙

聖主軫念有關運道民生

特勅加幫修理預備歲搶料物所費不下數十萬

金皆動用正項錢糧仰見我

皇上慎重河防之至意查錢糧俱由管河道轉發
各州縣募夫辦料欸項繁多支應紛雜該署

道楊守知在工年久亦明晰河務但值此大
工興舉之時錢糧關係尤重必得賢員協理
方可慎出入而重稽查上年蒙

皇上勅發禮部堂主事朱藻操守謹飭辦事勤敏
自到工至今殊見勞績臣擬委令稽察河工
錢糧凡一應收發俱同該署道協理庶將來
核算易清於工程亦有裨益是否可行伏乞
皇上指示謹具摺請

旨仰祈

睿鑒謹

奏雍正二年閏四月十三日

奏奉

旨好已諭部存案矣欽此

請建石家橋一帶埽壩等工

題爲亟請建築埽壩加鑲防風以固堤工以衛
民生事該臣等會看得鄭州大堤石家橋迤
東一帶上年水勢平緩未經估入歲搶修冊
內自入伏以來大溜南趨直射堤根甚屬危
險應於迎溜處所下埽簽椿加鑲高厚復於
掃灣之處接鑲防風並築磯嘴壩工挑溜開
行以資捍禦又中牟縣拉牌寨一帶工程近
緣河面寬濶水勢浩瀚黃流逼射衝刷堪虞

必須下護崖順埽鑲墊防風仍建磯嘴挑水壩二座挑溜開行再將斷堤一道加幫高厚接至大堤以資鞏固又穆家樓堤工全黃大溜建瓴奔注坐當頂衝危險異常亟應下埽加鑲簽椿堅實方資保護查鄭州石家橋迤東堡房起至牛角灣迤下止計長一千二百三十丈內石家橋工長二十丈車道埠口工長四十丈牛角灣迤西工長三十丈牛角灣工長三十丈四共埽工長一百二十丈其餘

接鑲防風長一千一百一十丈並下水頭接
築磯嘴壩一座共估工料銀六千二百九十
五兩一錢六分中牟縣黃河南岸拉牌寨鑲
墊工長二百五十丈護崖埽工二段共長一
百六十丈並磯嘴挑水壩工二座以及加幫
斷堤工長二十五丈共估工料土方銀四千
三百一十九兩五錢六分又穆家樓埽工長
二百七十六丈估銀二千三百四十八兩四
錢九分據署管河道楊守知確估冊詳前來

臣等逐一親勘覆核無異因係緊要工程除一面檄行布政司先行撥帑給發各該印官乘時辦料募夫僱築署管河道楊守知監工督催并原冊送部查核外理合會疏具題伏乞

皇上睿鑒勅部議覆施行雍正二年七月初七日
題奉

旨該部速議具奏欽此部議准行雍正二年七月
二十二日奉

旨依議速行欽此

古今類編

條陳河工應行事宜

奏爲謹陳管見仰祈

睿鑒事竊

臣

一介寒微受

恩深重雖竭盡犬馬莫報涓埃自奉

命管理豫省堤工更加惕勵矢公矢慎冰蘖自持
凡有裨於

國計民生者悉心諮訪有所見聞不敢隱匿前
恭請

陛見原擬據實口奏面請

聖訓祇緣欽承

諭旨未敢擅離謹將緊要事宜具摺奏明伏祈

皇上睿鑒施行

一修築堤工定例每土一方給銀一錢二分

內除加一節省外實給銀一錢零八釐

臣

恪遵定例批令管河道照數給發在案但
細加採訪平易工程每方九分六釐可以
敷用恭逢

皇上聖明內外並無雜費似應於扣存加一節省

之外再扣加一節省留存河庫作正項支銷以裕

國帑倘有難做之工及取土甚遠并買土搶險者責令管河道親加察核酌量加增庶帑項不致虛糜而工程亦免悞累矣

一河工錢糧不比州縣黃流泛漲呼吸變遷有昔險今平今平忽險者有突遇危急所川銀兩浮於原估之數者亦有不及題估而急需贖做難緩時刻者事當倉猝勢若

救焚不得不多用料物金錢移緩就急竭力搶護以保運道民生若執一而不變通則該管各官恐有賠累或致臨事畏縮貽悞非小如今年伏秋兩汛水勢異漲處處告險備費周章仰賴

聖主軫念河防先幾指示俾得凜慎欽遵幸保無虞臣愚以爲凡一切工程或有昔險今平者據實扣除或有今平忽險及水勢汹涌搶救銀兩浮於原估者據實題銷如有緊

急險工難緩時刻者一而題估一面通融
接應惟在臨時相機修防管河道嚴加察
核毋許冒破庶緊急工程不致坐失機宜
矣

一柳枝荻葦爲河工第一要料豫省堤圍柳
株歲久瘠枯更兼連年險工取用採伐殆
盡至荻葦一項原非中州土產舊例俱以
穀草秫秸代用入水卽腐不能經久臣查
黃河兩岸濱河處所多有新淤灘地地方

官逐一清查其未經墾科之灘地或有種
荻一頃或有種柳千枝實能成活濟工者
驗實詳報咨部官則給予紀錄民則給予
頂帶榮身則人皆踴躍二三年間荻柳蕃
盛而歲修購料銀兩可以漸減矣至現今
一切堤佔地畝并取土挖廢坑塘合無仰

請

聖恩俯賜循照江南之例俟堤工告成之後行令
地方官逐細查丈蠲除錢糧仍留充栽柳

種荻則所產愈廣在

朝廷普寬大之恩小民免虛糧之累而物料之所
出當不減於正供之所入矣

一豫省原額堡夫因臣上年奉差到工往來
堤上見其踪跡寥寥有名無實且不詣簽
椿下埽是以議請裁去循照江南之例添
設河兵駐工防護庶爲有濟荷蒙

皇上聖明

特諭調撥江南河兵來豫修守隨經河臣齊蘇勒

抽調十河管兵一千名千把總六員赴豫
當同臣等擇其險要之處分派安插訖但
歸德府屬考城商邱虞城三縣不敷分撥
原未安兵今值冬季裁去堡夫則兵夫俱
缺乏人防守况水勢上游既經收束則下
游自漸湍激尤宜加意防範似應再於南
工調兵二百名分令駐防庶工程大有裨
益矣

以上各條臣從慎帑急公起見於查工之際

細加諮訪所有一得之愚不揣冒昧謹具
摺

奏

聞是否可行恭候

皇上訓示爲此具

奏伏祈

睿鑒雍正二年十一月初三日

奏奉

旨九卿速議具奏前議裁去堡夫之議似屬未妥

不可固執再詳悉斟酌確議奏聞欽此

預撥歲搶修銀兩

題爲遵例

題明仰祈

睿鑒事雍正二年十一月二十八日准工部咨爲
遵

旨議覆事內開該臣等會議得嗣後歲修工程應
於本年十月內題估次年四月內題銷如逾
限不行題銷將所用錢糧着落授受之員賠
還等因奉

旨依議通行欽遵在案伏查江南歲修工程俱係
上年冬間發銀備料經過本年桃伏秋汛之
後於水落工平之際河臣核實

題估次年造冊

題銷成例已久但豫省從前原無歲搶工程因
近年黃河水勢泛漲兩岸堤工大溜頂冲險
汛林立欽蒙

皇上允臣所請

特勅總理事務王大臣會議照依江南歲搶修之

例按年估修以資鞏固因事屬創始並無額設辦料銀兩是以河臣齊蘇勒將雍正二年歲搶修工程先於雍正元年十二月內相度河勢情形酌量險要處所共

題估銀五萬九千餘兩於司庫撥解購料以備臨時應用併聲明黃河大溜趨向無常有初險今平今平後險之處未可預定雖以現在情形購料分貯嗣後遇有此平彼險之處應令該管各官就近於平緩工內通融撥用以

資搶護在案今雍正二年分歲搶工程經臣等揆其緩急因時通融撥給料物以濟修防獲保無虞除將做過丈尺工段現在查核遵例於次年四月內

題銷外其雍正三年歲搶各工錢糧仰祈

皇上俯照江南估修發帑之例勅部於司庫內先行撥銀五萬兩移解河道及時分發備料統俟經過桃伏秋汛之後將用過料物銀兩核定實數照例於本年十月內

題估次年四月內

題銷如有餘剩料物仍令加謹收貯以充下年
修防之用倘有不敷再行

題明撥給庶工程有裨而帑項不致虛糜矣臣
謹會同河臣齊蘇勒撫臣田文鏡合詞具

題伏乞

皇上勅部議覆施行雍正二年十二月二十一日
題奉

旨該部速議具奏欽此部議准行雍正三年二月

旨依議欽此

議留堡夫並建堡房

奏爲遵

旨確議仰祈

睿鑒事雍正二年十一月二十二日臣於武陟工

次跪接

皇上硃批臣謹陳管見等事奏摺奉

旨九卿速議具奏前議裁去堡夫之議似屬未妥
不可固執再詳悉斟酌確議奏聞欽此臣欽遵

跪讀

聖訓仰見我

皇上至聖至明慎重河防

睿慮周詳無微不至洵非

臣

等愚昧所能窺見萬

一者也伏查豫省堤工緊要荷蒙

皇上指示方畧得以遵循修築又奉

特旨調撥江南河兵來豫防守簽椿下埽俱能合

法是以今年伏秋水勢異漲獲保平穩茲以

裁去堡夫之議未妥上厘

聖懷敕令不可固執再詳悉斟酌確議奏聞

臣惶

悚無地謹悉心籌畫再陳管見恭候

聖裁竊思豫省兩岸堤長一千三百餘里加以近年新建埽壩并歲搶各工不下數十處在在需人防守今以調來河兵一千名而裁去九百餘名之堡夫自難免顧此失彼之慮況河兵生長江南遠離鄉井千里防河未免人懷歸志雖經臣等會議一年一換而往返道途不無曠工廢事似宜兵夫兼用協力修防庶收實效今蒙

皇上洞鑒及此誠堤工萬世之利

臣

愚以爲老弱

無用之堡夫可裁精壯有用之堡夫不可裁
相應將堡夫名數照舊仍留嚴飭廳印各官
選擇年力精壯者充當所給工食亦照給發
兵餉之例包封唱給務使均沾實惠是設一
名堡夫卽得一名之用而可免有名無實之
弊矣再查堡夫工食每名月給銀五錢守兵
餉米除朋扣外每名月給銀一兩一錢九分
若堡夫中有能跟隨河兵習學椿埽工程諳

練明白者該印汛官驗實出結保詳卽拔作
河兵照例給餉於年終造冊報部每年計拔
堡夫若干名卽將調來河兵發回若干名其
所缺堡夫另擇年力精壯者充補二三年間
若可得諳練椿埽上著河兵五百名以幫堡
夫之不逮則既有河兵簽椿下埽又有堡夫
負土擔薪修防有賴而南工之兵俱可發回
豫省之堡夫亦人人踴躍於工程實有裨益
至於堤上舊制每二里設立堡房以便棲身

修守因年久坍毀十無一二前南工兵到無地容身臣令各印官捐搭窩蓬暫爲栖息伏秋連雨頗受其益合無仰懇

聖恩仍照舊制行令地方官每二里建堡房一座每座約銀三兩卽於節省項內動支報銷則一應兵夫住足有所風雨不離長堤蜿蜒燈火相照聲息相聞縱遇險工一呼卽應則搶護不致失時矣緣係奉

旨詳悉斟酌確議事理不揣冒昧謹抒管見是否

可行伏候

皇上訓示爲此具

奏伏祈

睿鑒雍正二年十二月初九日

奏奉

旨嵇曾筠從前曾奏請將堡夫裁去今復以堡夫
照舊仍留具摺奏請這所奏近是但摺內稱將
堡夫內選拔充補河兵照例給餉將從前江南
調來河兵發回等語今若將堡夫拔補河兵其

調來河兵發回作何著落之處並未議及著將
本並摺交與九卿詳閱如照嵇曾筠所奏可行
卽議准行如有未盡處九卿各抒所見詳議具
奏欽此議覆准行雍正三年三月二十六日奉
旨依議欽此

請修月格等堤

題爲陽武大堤危險急宜修防以資鞏固事該
臣等會看得豫省南北兩岸遙月格堤案准
部覆俟桃伏秋汛後確估具題等因奉

旨依議欽遵轉行遵照在案祇因上年秋冬南北
兩岸堤工千有餘里同時並舉勢難兼顧是
以未敢遽爲

題估今加幫工程竭力嚴催已據各州縣陸續
呈報皆已完工所有應築遙月格堤最緊要

之處上年秋汎水長竭力搶護幸保平穩今
亟宜乘時擇險幫築以資鞏固 臣謹會同河
臣齊蘇勒親詣該工逐細確勘如蘭陽縣北
岸雷家新莊耿家寨四門堂等處舊有月堤
二道儀封縣埧陽集前舊子堤一道皆因年
久失修殘缺卑矮一遇汎水長發由堤頂漫
溢直達大堤汕刷衝激危險堪虞亟應加幫
高寬以爲外衛又祥符縣南岸一覽臺等處
大堤切近省城堤工單薄亟應幫築貼堤以

爲內戩又姜家莊程家寨舊有月堤二道格
堤一段單薄卑矮一經水長漫及堤根甚屬
危險亟應加築高厚以爲捍禦又考城縣南
岸胡家道口石家莊舊壩月堤一道商邱縣
南岸蔚家窪大堤一段外月土壩一道虞城
縣南岸待賓寺月堤一道俱因年久未修卑
矮單薄上年秋汛水發溜逼堤根甚屬危險
亟應加幫高寬並築子堰以爲重障查蘭陽
縣雷家新莊耿家寨月堤工長一千八百零

一丈估加新土五萬八千八百七十五方該
實銀五千六百五十二兩四門堂月堤工長
四百六十六丈估加新土一萬四千四百六
十八方五分該實銀一千三百八十八兩九
錢七分零查儀封縣埝陽集前子堤工長一
千五百五十八丈估加新土六萬四千八百
二十九方八分該實銀六千二百二十三兩
六錢六分零以上蘭儀二縣堤工共估新土
一十三萬八千一百七十三方三分每方銀

九分六厘共該實銀一萬三千二百六十四兩六錢三分零查祥符縣一覽臺幫築貼堤工長一千九十一丈共估新土一萬五千二百七十四方該實銀一千四百六十六兩三錢零又姜家莊月堤工長一千五百七十丈估加新土四萬一百七十方該實銀三千八百五十六兩三錢零又程家寨月堤工長一千一百八十九丈估加新土三萬一百二十八分該實銀二千八百八十九兩八錢六分

零又舊格堤一段工長一百九十五丈空缺一段應接築格堤與月堤相連工長五十丈共工長二百四十五丈估加新土七千九百六十方該實銀七百六十四兩一錢六分以上祥符縣堤工共估新土九萬三千五百六方八分每方銀九分六厘共該實銀八千九百七十六兩六錢五分零查考城縣胡家道口石家莊舊壩月堤長四百八十五丈估加新土一萬五千五百七十七方三分該實銀

一千四百九十五兩四錢二分零又商邱縣
蔚家窪大堤工長二百九十三丈五尺估加
新土六千九百五十五方九分該實銀六百
六十七兩七錢七分零又外月土壩上加子
堰工長二百七十丈估加新土一千五百六
十八方該實銀一百五十兩五錢二分零又
虞城縣待賓寺月堤工長一千二百一丈估
加新土二萬六千九百二十一方七分該實
銀二千五百八十四兩四錢八分零以上考

商虞三縣堤工共估新土五萬一千二十三
方每方銀九分六厘共該實銀四千八百九
十八兩二錢零前據詳估經臣等嚴批核減
去後今又據管河道副使佟鎮詳稱委係據
實確估並無絲毫浮冒詳請一而具

題一面撥帑募夫疾償完固度重門有賴等情
冊詳前來臣等復加親核無異除將原冊送
部查核一面將奉

旨撥交臣嵇曾筠銀五萬兩內檄令管河道動支

給發募夫興修務於伏汛前乘時價築以資
鞏固臣謹會同河臣齊蘇勒撫臣田文鏡合
詞具

題伏乞

皇上睿鑒勅部議覆施行再照兩岸應行估修遙
月等堤之處因伏汛將臨未能尅期並舉謹
將亟應修築首險各工先爲

題估合併聲明雍正三年五月初十日

題奉

旨該部速議具奏欽此部議准行雍正三年六月

初五日奉

旨依議欽此

留工効力人員

題爲遵

青具

題事竊惟河工以用人爲本用人以諳練爲先
查豫省南北兩岸堤長一千三百餘里其間
工程遙遠河務浩繁一應奔走往來不得不
收効力人員以供驅使以資防護臣自到工
以來見有佐雜生監各員范昌治等紛紛具
呈請願河工効力臣逐一考驗除不堪委用

者不准分釋其精明強幹可供驅策者共有
五十六人卽委令分任督工防險諸事俱能
自備鞍馬出力行走卧雨餐風其勤厥事且
各盡心習練頗見勤勞若令留工一二年則
皆成諳練之才竊思伊等不辭辛苦原爲功
名起見臣亦不敢遽爲代請議敘惟求

皇上洪恩容臣將伊等功績履歷造具冊結咨部
存檔准其留工効力學習俾伊等知進身有
階自能人人奮勉而臣亦可收臂指之效矣

理合恭疏具

題伏祈

皇上睿鑒勅部議覆施行雍正三年九月二十六
日

題奉

旨該部議奏欽此